

**Incumbensa Dürler concernent l'augment da l'indemnisaziun da la Banca chantunala grischuna (BCG) al chantun**

Pervia d'in blog dal laboratori d'ideas Avenir Suisse han las medias rapportà l'atun 2023, che las garantias chantunalas a lur bancas chantunalas possian preschentar ina ristga finanziaria considerabla, sch'i dat in crash, sco p.ex. tar la Banca chantunala bernaia ils onns 1990. La Regenza e la BCG han declerà, che tut vegnia fatg per impedir quai. Per stimar las ristgas vegnian perquai er fatgs rapports da ristga e da responsabladad externs. En quest connex possia vegnir constatà, che per la BCG sco banca cun ina substanza ordvart ferma possia in tal eveniment vegnir classifitgà sco fitg pauc probabel. Las ristgas da cyberattatgas, d'eventualas correcturas al martgà d'immobiglias u al martgà ipotecar (er guardar exempels actuals «Signa» ed «Evergrande») u da chaussas sumegliantas èn s'augmentadas e sa midadas fermamain ils ultims onns. Tras differentas participaziuns ha la BCG er survegnì ils ultims onns access ad ulteriurs secturs da fatschenta ed augmentà considerablamain il volumen da fatschenta.

La garanzia chantunala e sia indemnisaziun è fixada en la Lescha davart la Banca chantunala grischuna (DG 938.200). Il model actual cun l'indemnisaziun procentuala sin basa dals agens meds finanzials necessaris regulatoricamain e cun in rabat correspondent, sch'ils agens meds èn pli auts, sa focussescha fermamain sin l'agen chapital. Questa indemnisaziun orientada a la substanza ha l'avantag, ch'ella po vegnir realisada en moda relativamain simpla. Ella resguarda dentant pauc las ristgas che resultan da las midadas en las decisiuns strategicas en il decurs dals onns. I n'exista per exempel nagina obligaziun da controllar regularmain il mecanissem e l'autezza da l'indemnisaziun ed i vegn er ignorà cumplettamain in aspect considerabel da la garanzia chantunala: Tras la garanzia chantunala ha la banca in avantag da refinanziaziun economic direct ed indirect ch'è decisiv sin il martgà da chapital. Per resguardar quest avantag da refinanziaziun stuess vegnir creà per la banca mintgamai in rating cun ed in rating senza la garanzia chantunala. La differenza da rendita stuess alura vegnir considerata per calcular l'import da l'indemnisaziun annuala da la garanzia chantunala. Anc adina è il chantun engaschà fermamain tras il chapital da dotaziun e tras il grond dumber da certificats da participaziun e stat uschia implicitamain bun per la banca.

Las sutsegnadras ed ils sutsegnaders incumbenseschan correspondentamain la Regenza da suttametter al Cussegl grond in project concret en il rom d'ina revisiun da la Lescha davart la Banca chantunala grischuna (DG 938.200) cun la finamira d'augmentar considerablamain l'indemnisaziun annuala da la BCG al chantun en il senn d'ina premia da ristga.

Cuira, ils 23 d'avrigl 2024

**Dürler**, Mittner, Bavier, Adank, Berthod, Brandenburger-Caderas, Butzerin, Candrian, Casutt, Cortesi, Della Cà, Favre Accola, Furger, Gort, Grass, Hefti, Heim, Hohl, Kasper, Koch, Krättli, Kreiliger, Lehner, Menghini-Inauen, Morf, Natter, Rauch, Roffler, Sgier, Stocker, von Tscharner, Weber